

六一山房詩集

六一山房詩集卷三

甲寅至丙辰

鄞董沛覺軒

甲寅

猛虎行

猛虎行不可聞山中猛虎食熊豕城中猛虎乃食人食
人人莫當虎子能爲狼虎女爲狐孫則羊

題劍

三尺寒鋌百鍊精暗風淒絕鬼狐聲尋常恩怨分明在
拚與吳鉤結死盟

慈谿金烈婦詞

湛湛溪水清不奪明月光耿耿烈婦心不鑠金石剛烈

婦李家女生長歸仁鄉

屬象山縣

十七嫁金氏夫婿爲漁郎

漁郎常出門惻惻離別腸堂上有威姑烈婦職羹湯威姑性淫狡中葦茨生牆倚門延蕩子蕩子隋隄楊楊花逐流水流水雙鴛鴦鴛鴦忘匹耦陌路相勦翔朝歌輕薄篇暮歌陌上桑蕩子悅婦貌婦貌姑射妝殷勤托媒氏宛轉微意將壓鬢珊瑚釵稱體芙蓉裳懸黎絡美玉翠羽綴明璫但求一夕歡願脫千金裝烈婦知有夫要我非孟姜斷指誓弗從蕩子心回皇浸潤孽威姑威姑肆披猖鞭撻無完膚流血凝禪襠坎地深室中六尺形

正方荆枳雜瓦礫密布如鉤鉞上覆一枿板壓體同尸
僵繫孔容杯甌蹴爾麤米粢伸手自掬食五日纔升糧
忍死待夫壻歸信終茫茫奇冤既不雪何以甘自戕婦
苟一念轉採彼葑與唐威姑大歡喜反面爲慈嫗爲婦
購珍藥爲婦療金創華以文繡衣薰以蘭澤薌餐以琉
璃盤扶以翡翠牀頃刻判仙鬼行樂殊未央其柰烈婦
性凜凜嚴冰霜百折誓不回萬苦身備嘗於時秋夏交
酷烈天恆暘蚊蠅聚族居蛇虺國其旁攢嚙痛入骨髓
潰成膿瘡奄奄彌六旬蕩子視則佯威姑恐兒歸發露
難蓋藏辣手拚一決滅口無他殃燔柴煮壺水百沸金

鐵錫謀灌烈婦身厲氣驚上蒼青天起巨雷一震聲硠
硠覆水不自持威姑嗒焉喪東鄰告西鄰此事天理彰
公憤約同志排闥搜帷房昇婦出鬼穴縛姑登縣堂縣
官南面坐庭訊究端詳烈婦尙能言炯炯雙病眶冤訴
罄顛末長歎始身亡縣官凜三尺婦死應姑償喧闐肉
鼓吹遍體皆鱗傷慈谿令庭鞠時憤甚呼皂役以竹木杖亂擊之觀者稱快巡街警
淫愚斃獄銷兇狂縣官拘蕩子蕩子身遠颺係累及家
屬搜括無完囊蕩子蕩不歸烈婦烈異常事當咸豐初
太歲在昭陽婦死八月中婦葬城南岡慈谿好義者庀
財同舉襄元堂蔭松柏松柏翎孤鳳華表雙闕高金碧

何輝煌以待

天子旌大書烈婦坊作詩紀本末擊節歌慨慷俯視溪水
流仰視明月光溪流鳴咽聲明月照屋梁

題陳駿孫

繼聰

辛壬雜紀

天作東南鎮聲靈萬國宗小夷方鼠竊大將太龍鍾碧
海橫秋汛紅煙警夕烽憑君書一卷舊事記重重

二

南八傷心淚睢陽固守時油江師可縛棧道敵偏知迨
雨籌防早聞風轉戰遲河山空悵望落日照靈旗

三

恃此風濤險公然守備單哥舒生陷辱余闕死綏難百
隊胡傳箭三軍馬解鞍元戎能避敵慷慨舊登壇

四

澤國稱雄鎮如何竟被兵殘魂羞止水飛羽到連城羣
盜炎威赫流民旅夢驚十年前恨事回溯轉分明

五

金帛輸戎帳偏誇下趙陀陸生能說敵居敬實通倭道
路黃巾貴衣冠碧血多徒聞炎海外今日尙風波

分詠古美人得一絕句

虞姬

我帳燈昏夜寂寥
楚歌一曲已魂消
君王回首巫山夢
悔不阿房貯阿嬌

張麗華

蒙面何人距晉王
後庭花落總神傷
可憐一片清溪月
長照江都歌舞場

聞

王師南下

決莽山川殺氣橫

王師傳檄又南征
乾坤落落誰知我
吳楚荒荒正苦兵
絕地安營軍易撼
滔天洪水勢難平
諸公凜有前車鑒

好把江南半壁撐

乙卯

湖亭紀事詩爲王生作

湖光如繡春如畫曲曲沙堤香世界新月高懸碧玉梳
晴風巧翦紅羅帶洛陽門第女兒居十二闌干繞綠渠
南部煙花新載筆西陵松柏舊停車天生麗質難自棄
倚門翻撩游人意頑石三生也點頭橫波一轉徐含媚
媚香樓上夜迢迢杯酒王孫未肯邀司馬求凰遲奏曲
蕭仙引鳳忽吹簫楊枝苦被他人折空唱胡笳十八拍
環佩依稀月落時夢魂惆悵燈寒夕阮郎歸里興猶賒

湖曲重尋仙子家地主有情畱竹素天台無路問桃花
琴聲渺渺停幽院悄閉雙鑲尋不見風爲羈春緩解幃
雨因畱客徐牽綫珊珊仙骨下蓬萊淡白梨雲一笑開
微步輕移香作印慵鬟小髻翠橫釵柔懷宛轉憑誰訴
掩抑羞容仍返顧碧玉相思恨有夫黃金欲買慚無賦
嬌紅柔翠點羅衣蝴蝶隨人款款飛願作鴛鴦翻水戲
不堪杜宇喚春歸倉皇返棹愁無語儂別月宮卿是主
片席孤懸范蠡舟空牀誰寄梁鴻廬香隱隱漏遲遲
正是思卿腸斷時眼底雲煙愁外過別來滋味夢中知
瑤臺璧宇花開足離恨江南萍水綠蓮子盈房可有緣

桃根打槳偏無福
浮生離合豈由身
不是多情不解親
盡處雨雲都幻夢
暫時晤對亦良因
閒情分付管城子
替儂細雪風流罪
哀絲豪竹夜如何
綠慘紅愁吾已矣
君不見三月飛花恨
雨天沾茵墮溷本
前緣祇慚公子
王煙客不及梢人
賈浪仙

詠明季八首

南京

天塹投鞭事已非
南朝舊恨總青衣
千官姓氏降書在
六代江山王氣微
誰使上流空有鎮
可憐中露竟無歸
高皇手創艱難業
依舊臺城燕子飛

福京

殘局甌閩一載亾赤符天子舊高牆淋漓大筆書三詔
顛沛乘輿出五將衛祭原由甯氏政周遷難倚鄭莊強
橋山弓劍畱遺恨不作降藩執梃王

肇慶

河山牛角勢孤危公在乾侯有幾時遺像空瞻神祖貌
行朝不替漢官儀龍蛇蠢動勳藩劍猿鶴哀鳴使相旗
楚粵播遷無定所儘煩張陸苦支持

安隆

燭火西流瘴霧昏居然皇帝一名尊義兒自別忠姦傳

降盜都沾霄命恩纔賀擒王探虎穴翻教篡國鬪蛇門
秋風蔓草成仁處猶蘸羣公碧血痕

緬甸

野次馮君路已窮尙畱餘息到蠻中三分季漢無完土
一樣西遼有寄公殉國遺臣悲兇水毀巢取子怨飄風
勤王舊部沙陀在煞費鷗兒百戰功

西興

南鎮猶棲甲五千霸圖銷歇舊山川餉窮累奏黃門匣
火燼難燒赤壁船太叔一家頒詔隙上公九命握符權
倉皇東去波濤闊空使西州泣杜鵑

舟山

蛟關直下水漫漫孤此金湯繫一丸糧廩內供山寨亟
版輿外接海天寬符分割竹封侯易券約扶桑乞旅難
白首同歸諸老盡殘碑宮井有誰刊

臺灣

樓船百丈阻橫波海外虬髯事若何南粵僭王娛武帝
西周正朔表共和地通閩嶠因糧便水到澎湖落際多
一代興亡成一局抗懷前事起悲歌

閉門

閉門無箇事搔首試長吟苦覺秋風裏孤花有怨心

送燕

江南有客歎飄蓬
行路淒涼舊侶空
偃影樓頭畱款語
斷痕天末憶離衷
關河旅况悲遊子
王謝家風本寓公
自是主人無著處
獨憐孤影夕陽中

雙雉篇

錢唐八月秋風天
明聖湖中泊畫船
諸君靜坐且弗歡
聽我醉歌雙雉篇
兒家近傍西湖水
借得西湖比西子
生生不適何氏門
薄命甘心爲郎死
與郎生少同里閭
總角嬉遊旦復旦
春風翠幃芳草隄
夜月烏篷蓼花岸
年光冉冉非少時
與郎同學又同師
相憐相狎不相妒

妾心宛委郎心癡
亭亭之花並蒂開
翩翩之鳥比翼飛
依依錦瑟和同調
叩叩香囊寄豔思
郎心如月妾如鏡
一樣澄懷兩相映
但願同死不同生
生死一舟倚爲命
韶華轉瞬駒隙過
理絲搦竹行樂多
好遣巫山夢雲雨
那知平地起風波
郎家堂上有阿父
謂郎讀書爺作苦
讀書萬卷貧無醫
不如去作長安賈
長安迢迢路四千
中隔千山與萬山
揚子江深波浪惡
華岳峯高行路難
徐州洛州多盜賊
黃沙冥冥日無色
朔風凜冽征衣單
雪擁潼關行不得
贈郎皎皎白玉盤
如郎歡笑對妾顏
贈郎燦燦黃金筇
願郎鄭重明妾志
白玉無瑕妾守貞

黃金難買一寸情淒涼杯酒與郎別郎不能歡但嗚咽
西湖三月楊柳青送郎慘慘登旅程西安九月木葉下
憶郎迢迢恨長夜秦山蜿蜒吳山高兩地相思魂夢交
別來滋味有誰識惆悵懷人對明月明月照妾還照郎
妾心結轡郎心傷郎心有妾郎身遠妾心有郎妾命蹇
東鄰貴家昨暮兒三十爲郎衣錦歸西鄰少年遊冶子
三千食客盡珠履東鄰西鄰來聘妾媒妁盈門妾心急
妝臺悄啟明鏡函萬般愁壓雙眉尖聞道妾身許何氏
自料今生欠一死藕絲力薄金刀重叶弄玉吹簫難引
鳳母也天只不諒人顛倒思郎惟有夢夢郎攜手同學

時彈箏巧譜迴文詩夢郎執手分離日錦馬籠頭萬絲
雪更籌苦短繡衾薄好夢如塵不復作慵鬟墮枕綠雲
低香淚凝脂紅雨落羅衫怯怯風露涼侍兒解意藥先
嘗幽情苦緒少人見病骨支離已在牀多生久作相思
債愁恨填胸慘如醉草枯有影螢火低花萎無香蝶魂
墜郎行迢遞妾纏綿醫卜無靈誓棄捐但願王孫歸有
日不須仙使表延年春風消息報桃李江上驚傳書一
紙今年可卜郎歸來郎未歸來妾病起西安二月塵沙
黑郎馬駿駿壯行色西湖六月荷芰香郎車綏綏歸錢
唐紅窗四面隱高閣少婢傳言會私約誠知歡會不多

時但作蜉蝣朝暮樂江南八月哀雁啼吉日親迎知有
期莫道紅絲緣已定要知碧玉恨成癡湖雲黯淡湖流
駛湖月昏黃夜泣鬼誓書旦旦天鑒之不願同生願同
死高樓百尺挂絲繩浪說歸妻未泮冰與郎私會訂偕
老熒熒碧火懸孤燈寒塘秋氣逼衰柳悄悄深閨掩戶
牖不及黃泉無見期郎死在左妾在右芳魂一縷隨飛
煙斷送玉容人上天黃鵠歌殘簫已斷青鸞影破鏡難
圓銀瓶擊碎唾壺缺塵世茫茫心決絕萬里青畱塞草
香三年碧化泉臺血東鄰西鄰悲復悲是何貞石不可
移無奈雉媒生作梗不容鳩婦死相隨簫言鼓惑兩家

煽妝點詞頭控花縣遂使優遊比目魚猶似分飛斷腸
雁錢唐縣官仁且賢覆盆照處民不冤燕臺下令購遺
骨判費初明十萬錢工師相度南屏路遙對孤山蘇小
墓生不同室死同歸此是玉人埋玉處巫陽別後更無
雲猿鶴悲秋已斷魂下馬遊人齊奠酒淚痕迸作湖波
痕是郎不愧多情侶是妾不愧離魂女同衾未許作鴛
鴦同穴居然歸鳥鼠高梧葉落碧天荒潘令何人賦悼
亡萬瓦凝霜秋已冷一簾貯月夜偏長郎年十九妾十
八郎也姓陶妾姓葛楊花逐水水流闊萬縷情絲忍難
割金環消息去茫然入地無香安可活董子醉醒歌已

終湖光倒映羣山空吳箏淒怨秦箏裂從此天地多悲風

古謠辭

拔劍而起先生醉矣咄咄書空咳唾千里

二

崑崙萬丈不可以手攀上有仙人胡爲乎病顏

三

中庭起立愕愕四顧柰何神獅而縛狡兔

四

生不識韓荊州布衣躑躅荒江頭耳聞瘦馬戚戚呼老

牛

五

道旁死骸百虎食之茭茭之肉何以充爾飢

六

富如猗頓不能千載樂黃金白璧輸君家詒爾子孫供

一博

七

天門巍巍千春一開稽首予穹上帝吾願斯世洞洞皆

嬰孩

丙辰

襄陽曲

襄陽眾兒女齊唱楊柳枝漢水日東下郎行無歸期

徐柳泉舍人延余校宋元四明志卽事有贈兼示

陳子相明府勸

百家地理書厥祖始夷堅郡國有計簿乃在班史前吾
鄉建州號肇自唐開元有宋大觀初圖經始成編作者
迭相繼文藻輝山川到今七百載棗本無一傳傳鈔付
寫官謬種相流沿壺矢并爲樂益稷分爲篇曹部無正
聲誰識宮與軒豈曰有宋存殷禮吾能言

吾愛徐孺子萬卷羅高閣連年兵火中猶尋讀書樂
我桑梓鄉文史正穿落笏搜百氏言精究六藝略連綴
改定之一手自刪削述者之謂明其功乃踰作

三

南里不失真東沙已殊轍下逮聞曹書涇渭更無別徒
侈新義陳罔顧舊文軼閒或稗販之古人意愈失豈真
蘭臺經行賄改以漆三豕或渡河誰識已亥日惟君發
舊藏論古有真訣博收天祿書一一證吾說因博以致
精河閒事求實幸此六帙存金甌已無缺

四

校書如揀金披沙每見寶一覽謂了然何由測微妙於
時陳太邱衣著遂初早郵筒日往還相與證幽討此君
故善疑因疑乃生巧每於一綫中時闢康莊道文懿能
補戈荆公戒撲棗空山有落葉時時爲君掃不見通鑑
成兩屋滿堆藁

五

賤子少食貧託鉢走四方著書杳無期辜負日月長惟
君知我心招我登君堂寸寸襪綫才奚補天孫裳望洋
起長歎目眩金碧光敢以蠡測深與海較斗量咸信志
臨安景定志建康未若吾鄉書篋入

天府藏行當十匹酬羅列凡與箱傳鈔八千紙紙價貴
洛陽

和作

同縣 徐時棟 柳泉

明州之建國肇自唐開元繇歷至北宋迢遞四百年
必當有專志而皆俄空焉於是張子問乾道爲初編
張侍郎津作乾道四明圖經
津字子問見二老堂詩話

二

乾道非足帙寶慶斯完書

胡尚書槩作寶慶四明志

全氏朱槧本

不知今誰儲

謝山得宋刻寶慶志後歸揚州馬氏今又不知流落何所矣

乃以草

頭謠并其書亦汙末學妄滋議先生言非與主修出

胡氏作者方羅俱

謂方校官萬里羅錄參濬

錄參不可考校官則

真儒書中嚴體例郡縣分部居史傳或私論而亦非

黨譽

史忠定傳至六千餘言

開慶續斯志或復譏貢諛

梅太府應發等

作開慶四明續志專記吳丞

相潛四明政績及其詩詞

好名固常耳孰爲民勞

叶

劬但有政三異何惜書滿家

嗟吁

三

文清元大儒出入承明廬延祐有繼作其時方家居

袁文清柄作

延祐四明志助予呼將伯二考分遂初

謂遂初老人王厚孫至

正遂初筆讓名於蠡吾

遂初應蠡吾王侯元恭之聘作至正四明續志全書皆出

其手而歸前輩真謙德自與後賢殊我尙愛近志古

志其舍諸善價覓祕本巧借羅鈔胥久而郡五志竝

入吾家廚參之以大德馮州判福京作大德昌國州志是爲六志書

附之以它山吾鄉魏吉州峴作四明它山水利備覽是爲六志餘夏貢

周職方紀載賅寰區專志一郡縣宋元殆權輿郡苟

得一本珍之如璠輿吾郡多至此文獻天下無

四

魏弢七閣藏古志纔二十四明已居四二猶未曾入

寶慶開慶大德延祐四志竝入四一鄉水利書亦復

見收拾水利備覽亦入地惜我海濱士未能窺祕笈

輿記自明來靡國不修輯人物拔名賢藝文等家集
矯之略亦蕪武功與朝邑

余嘗極笑明人康韓
二志之盛得虛名

斯事

推宋元輿論至今翕異書不公世我亦徒什襲是用
刊刻之別本假曹鄴然而校書難秋山掃落葉徐子
告陳子謂子相晝夜長汲汲君少我十五時年僅逾廿
道路阻一江去我里過卅先民掌故書聞君久嫻習
刊成始知君鞭長莫之及

五

手民不識丁下刀能改字聘君雙校之乃復參論議
所見所傳聞古昔多同異今我述非作安用出新意

疇昔傳寫本荒謬不勝計爾時或更正鄙見詳新記
校勘記中劄記 固知寶鄉書君我有同志而惜君來
凡二十二卷 遲不得更成事紛紛百餘卷功成難毀棄焉亥豕
訛觸目真比比更校斯未能只今尙深祕一書傳人
閒精確信非易

六

萬事有定數人謀非能臧昔我刻成日度板家東廂
未幾遭寇警舉室遷倉黃吾兒獨念此斂之周祠堂
辛酉十月余先挈眷避入建隩 鵬鵠入我室 壬戌二
壽兒載六志板藏周茹香祠中 三月間
事 幸不爲薪傷明年罹劫火 癸亥十一月事 又脫回祝殃劫

灰十萬卷巍然畱靈光鄉賢實呵護同我恭梓桑我
每念茲役黯焉心惻怛蹉跎吾既悔願以桑榆償寶
慶未刻圖亦得假儲藏寶慶志之圖余得影朱佳本已焚如矣然郡中此志尙多有圖不難
嘉定失丈尺誰能補其亡
嘉定日月湖丈尺圖載之高隱
學敬止錄稿本中余擬附刻寶慶圖後
今稿本已灰燼世所傳鈔者皆無此圖
過隙駒匆忙成其可成者脫簡曾何妨斯文未墜地
百代有光芒兩劫各無恙此意焉可忘

七

近志出雍正百年未修飾貲力今有人主之以姻戚
郡中楊氏擬重修郡志
以其事屬陳魚門刺史
前事後事師老馬迷途識何

況張曹徒自用違古昔

明張東沙尙書嘉靖甯波志
國朝曹太守秉仁雍正甯

波志六志皆淵源顧我僅藏壁我欲以斯時與君同整

飭鄣西起老圃

謂子相

開徑延三益旣完前人書亦作

後來式往日不可追來日足可惜共成一簣功勛哉
交努力以是七種者永永傳無極庶幾天下士勿笑
海邦僻

贈張詩農編修

庭學

偏師收滬濱談笑作長城形勢吳門險江湖魏闕情
臣能報

國儒者亦知兵回首蓬山路迢迢萬里征

鹿山

一箭穿雲貫六峯漢家飛將可追蹤神仙信有非常技
射鹿歸來又射龍

余文敏公祠

名山洞府卽神仙戶冊猶題萬歷年江左風流謝安石
湖中煙景李平泉蘆汀雪滿鷗醒夢松巘雲歸鶴倚肩
豫計歸來歸未得綠波空繞寺門前

短歌

多精在橐山川寂寥羣峯皆笏我獨逍遙

一解

陶陶之

身滔滔之口容膝十年飲酒一斗

二解

晨登崑崙以望

日出日出不見乃見微月三解陰雨霽矣觀天之光天

光遠矣使我心傷四解

題程郡判景嵩點蒼積雪圖

程侯手持三尺絹飛白空青鬪華絢云是滇西古點蒼
太古凝陰互無算江南自昔稱炎荒禹跡不到衡山陽
逖矣昆明一池水深州徼外天茫茫妖魑煽霧跼鳶墮
冬無沈寒夏如火蜀雪駭見聞大聲況復滇山狎蠻獠
胡爲洱海瀾江中倒映削玉千仞峯是豈愚公有奇術
西移葱嶺來向東瑩冰朗朗界天白低處無蹤高處積
蠻花凍萼犵鳥驚金馬碧雞繪顏色乃知地氣隨轉移

朔南兩戒炎涼歧天體至高常至寒此山矗立天與齊
混予一氣剖真宰敢以陰陽分對待罡風吹作梅花巖
長夏不消如瀚海五嶽以外多奇觀夜郎自大吾舍旃
此山此圖覲眞面但覺毛髮森森寒君官兩浙去家遠
萬里關河鄉夢短此山何日從君遊豁我平生好奇眼
和友人述哀詩

碧草黃沙了此身秋墳風雨有誰親九原卿亦憐知己
一月吾曾作主人舊愛香君稱小墜難從妙子認前因
空庭惆悵棠梨夢玉骨冰肌委作塵

三五年時記弄錢司空見慣亦相憐羞將瓜果雙星誓
證取梅花一笑緣別院畱香春易老舞臺收影月難圓
青青依舊江南柳亭短亭長恨邈綿

三

自古佳人薄命多王郎如此柰卿何會真已誤紅娘約
長恨難忘白傅歌妝閣無緣棲燕子畫樓猶記喚鸚哥
江郎不解傷春恨南浦茫茫感逝波

四

卧榻經年瘦不支元霜無藥治相思愁多不斷金邊淚
病亟難尋帶下醫荒冢白楊應有恨御溝紅葉已無詩

從今莫結同心結天上人間有別離

六一山房詩集卷三

六一山房詩集卷四

丁巳至己未

鄞董沛覺軒

丁巳

報忠祠

祀裕靖節謙葛壯節雲飛王剛節錫朋鄭總戎
國鴻謝總戎朝恩五公及同時將吏士卒死夷
難者

扁舟出自望京門報忠祠宇丹雘新英英廟貌誰何神
道是辛丑死節臣東隅蕩定二百春龍宮蛟窟無纖塵
蕃落小醜蚩蚩負山敢外生成恩寇吳寇粵復寇閩

紅煙紫氣白日昏
神舟激水旋四輪
突入浙海鯨魚吞
巍巍葛天龍
武軍麟臺百戰衰
鄂動白手擊賊紅血痕
寶刀劃斷秋空雲
孤松磊落蟲螭根
謫書盈篋天不聞
危城抗賊幾一旬
大帥坐視如越秦
拚頭一擲酬

至尊真宰上叩天帝闕
太原傑士甘殺身
同日死者榮
陽君樓船百尺叩虎蹲
將軍碧葬金雞屯
埋霄顏霧汨
夕曛將士鼠竄西南奔
裕公倉卒退守鄞
一死報國何
逡巡鬼火青碧夜
見燐荒荒大漠皆戰氣
諸公正氣扶
乾坤後者文種前者員
丹心昭昭戀闕魂
生受抑死
則伸祠前古木烘朝曦
春秋享祀崇明禋
素車白馬來

帝宸百世祚我東海民

幽怨

小謫星娥玉樣姿暮雲天末寄相思
慵將羅襪畱塵跡病倩雕闌倚瘦肢
團絮因緣風易散落花消息雨先知
無端一舸辭家去江上青衫記昔時

二

雁鴻迢遞信難眞愁到睂尖黛亦顰
遊子十年衣上淚秘辛幾度帳中春
便攜銀管翻新曲猶記文簫作舊鄰
縷縷柔情縈不斷被風吹綰綠楊津

三

商聲淒婉十三絃心事惟憑錦瑟傳
啣石有靈填恨海
斷雲無賴攬愁天
秋風團扇悲同命
夜雨寒燈照獨眠
古俠黃衫應已逝
霍家幽怨有誰憐

四

渺渺天台路幾程
迢迢流水不勝情
馬卿莫解三年渴
牛女難忘七夕盟
生就楊枝原嬾娜
記來梨夢最分明
劉郎歸去無人問
辜負桃花一笑迎

哭樓秋帆文學

陰喬

飛鴻斷孤影觸耳多哀鳴
誰信天地中來此蕭颯聲
聲斷不復續結轡難爲情
恍恍一寸目上視孤月明月缺

猶再圓君死不再生長江水東下一去無流停使我方
寸衷哀與愁腸并

二

客秋君始病我時猶未知來與君聚談駭見形支離支
離在牀蓐瘦骨如枯枝數語卽別君強以言慰之謂當
計日瘳歡笑如昔時豈知愁苦身不耐西風吹鬼神亦
束手起死無良醫此別竟千古了無重見期渺渺知心
人存者恐漸稀

三

君家昆季儔半是我朋好屈指五六人相交獨君早憶

六一山房詩集 卷四
三
從先子遊於時各年少聯牀風雨中秋水證懷抱自此
廿年來倚君作東道有酒爲我謀有榻爲我埽明誓對
山川此樂可長保詎料貧病兼宛轉同衰草微名隸子
衿君已一生了

四

昔哭稽山子

君從兄孝廉世湮

痛極不成詩日月曾幾何乃作

君哀辭君年未四十下有呱呱兒君死不再生安解兄
弟悲悲君旣死日憶君未死時每借人言多爲我下箴
規嗚呼我負君此意良可師忍看君入棺任彼塵土埋
猶俟魂夢間與君相追隨孤燈青碧光如聞君語低君

語竟不聞但有風淒淒生魂與死魂從此長別離

感事

寥廓天容淨西風起暮笳中原多盜賊厄歲正龍蛇地
僻花無賴林空鳥亦嗟寄書從遠道問訊半無家

二

荒祲連諸郡東南村軸空黍苗供碩鼠藜藿飼哀鴻民
已脂膏竭官猶樵算工大江南北路都在亂雲中

三

鈴馬催官驛紛紛羽檄馳備多兵缺額情急火然睂北
府應難守西江漸不支毘連吳越界形勢總孤危

四

宵旰勤憂慮吾

皇自聖明祇憐當事策難慰下民情功薄邀虛賞時艱
賴重征彌縫無定畫何以致

昇平

公無渡河

哀鄰婦而作也結縵十日夫客於外以溺死婦
朝夕哭董子聞而悲之乃作此詩

公無渡河公竟渡河渡河不返公柰何腥風舞天雪花
起睽睽龍睛射人紫公平渡河公竟死朝哭河之湄暮

哭河之濱公乎不返消息眞柰妾嫁公纔一旬成行淚
雨洗睂黛百結同心綰羅帶妾身嫁公纔一旬妾心依
公自千載河水不枯妾心不渝河冰如鏡照見明月孤
妾心如鏡照不見公之軀嗚呼公兮命則無渾流湯湯
遠無涘風捲孤舟鬪石齒公平渡河公竟死公死兮公
命短妾生兮妾命蹇漂魂逐水東西流以水誓心心不
斷

鎮明嶺

秋樹暮雲平案山高出城文峯自突兀傳誦李夷庚地
若犬牙錯人從鼉背行大儒崇廟祀一樣仰高情

旁有
潛熙

四先生祠

月湖散步

纔別繁華境清涼世界開長橋驅馬過畫舫送鷗來水閣春風杳烟汀夕照回來堤疏樹影閒步興佳哉

三十自述

我生天地中渺焉太倉粟豈有上帝心爲我計榮辱讀書既不遂慷慨思挽強從軍二三載解劍歸故鄉慈母年已衰致身苦不早顧此菽水供何以慰親老種桑十畝閒種菊三徑存僅免飢寒憂是亦天地恩

二

溯我覽揆日乃與康樂同

十一月二十七日

愧無綺麗才創始

齊梁風詩書三十年舊學已榛莽一卷枯寂吟何由得
眞賞飲我劉阮酒下以郊島詩寒月在帷闥曠寄物外
思登山思作樵臨水思作漁漁樵不我偶獨立心躊躇
戊午

東錢湖岳王祠

老檜欹風影已寒將軍遺廟對層巒東湖諒比西湖好
故國宮垣不忍看

宋徽宗畫馬圖爲徐刺史

本題

徽皇御墨傳者稀此圖流落無人題圖中五馬各生動

赤馬騰蹕白馬馳一馬緩轡黃金羈一馬俯嚙豐草隄
一馬矯首舞長鬣似有鳴咽鳴聲悲丹黃五彩紛離披
天閑龍種神骨奇驚飈閃電落雙管想見君王得意時
君王畫馬是長技收拾江山餘一紙可嘆茫茫五國城
牧馬歸來圈如豕魂消雪窖孤臣哭天水興亡基一局
浮江化龍馬有靈出塞牽羊馬無角只今圖畫傳千年
滿紙恂恍生雲煙宣和秘藏雜真贗此圖彷彿曹與韓
徐侯讀畫兼讀史北望盧龍潛焉涕梓宮不返燈檠歸
朽骨何人購燕市

紹興舟中望會稽山

秋老官河冷孤帆送客行西陵明日到南鎮此山橫殘
雨收虹氣淒風帶雁聲擣衣砧不斷離思倍分明

牛車行

錢江東渡沙漲平過客乃駕牛車行牛車平底四輪轉
兩牛齊首行蹇蹇江船遠泊洪流中以車濟船船始通
船行三里車七里七里尙有三里水當歲九月吾過江
江潮不來天正風扶桑皎皎日出東龕赭一色江波紅
我乘我車望西渡瀾漫黃沙杳無路車道如繩一綫開
輪鳴轂應車始來一車十人車不窄輿夫在前振鞭策
路遙擔重牛力疲勁木橫肩四繩直車行漸遠沙漸低

沙中有水成爛泥行人裹足不敢進輿夫叱牛鞭聲齊
牛行陷蹄車陷轂激水迴輪聲輾輾須臾水漲及牛腹
轆下哀鳴氣逾促浪花亂蹴三丈高牛衰骨露肩脫毛
車中搖搖一身戰迫其停車日已半攀車過船車始歸
江風正挾吾船西船到杭州船亦住我更騎驢向西去

湖上

宜雨宜煙一幅秋湖光如此足勾畱疏花半掩橋邊路
行客齊登郭外舟孤嶼雲閒招鶴隱晴潭風定數魚遊
香山詩句眉山筆都付奚囊檢點收

韜光菴

臺閣起晴空羣峯作屏障彈指琉璃光毫髮現諸相我
來茲山遊心神頓清曠松俯意若迎簣互勢相向石級
踰百層開門見神將一目收全湖湖邊起江漲幾忘身
在巔獨立空倚俯流連未忍歸夕陽淡畫舫捫竹復牽
蘿迤邐下秋嶂忽遇樵子回林閒起高唱

孤山小青墓

是也非耶有若無美人姓氏總模糊飄零天地畱詩卷
冷落湖山對畫圖油壁難尋蘇小豔漆燈應伴菊香孤
西風蕭瑟無情緒遞到鴻邊草已枯

雜詩

卷四
世人皆醉而我獨醒不醉而醒惡乎得生東有猛虎西
有長鯨吾噤吾聲履危若平

二

白日西下照影於東吾身六尺顧如防風乃知形實不
如氣空茫茫太虛其道曷窮

三

東山水清西山水濁清者爲谿濁者爲瀆騏驥任勞不
如麋鹿肥甘腐腸不如餽粥

四

浮雲在山索之無跡清風入帷杳然而滅誰云此心煉

以金石靜與化遷百年一息

己未

感作

援琴彈古音古音衆所疑改絃非宿好撫軫有餘悲憶
從海上來久與成連期箏琶競凡響遂覺知音稀洞庭
木葉波渺渺秋風辭與君一再彈和者當爲誰

二

朝乘油壁車暮歸西陵道怯怯蒲柳姿逢秋已先槁彼
醜不自知塗澤以爲巧猶使蕩子憐謂彼出燕趙南國
有佳人朗朗絕塵表綽約冰雪肌荆布亦華好倚門羞

自媒憐者一何少願抱幽獨心甘向素幃老

遊上虞錢氏園

獨擅溪巖秀迴環一徑斜燕歸高士宅鶴伴野人家
夜雨滋紅藥春暉養白華莫嫌城市隔耕釣足生涯

客中懷同里故人得二十絕句

周介園廣文

道邇

簾閣抄書五十年孤燈寂寂對青氈聞曹舊志無佳本
手勒名山太史編

俞補卿明經

紘

一賦王郎斫地歌破樓風雨寄愁多沈香亭畔無知己

頭白衫青爾柰何

樓月潭太守 一枝

十載風塵倦眼開
暫因官守寄胥臺
江南猶是兵戈地
忙到書生縛袴來

徐柳泉舍人 時棟

著作班班已等身
撐胸千卷不憂貧
更推第一文章手
攻愧清容有替人

宋蓮叔觀察 紹葵

阿閣春風暖鳳巢
紅顏白髮漫相嘲
枯楊自有生稊望
澤木應占九二爻

陳曙山中翰

政鍾

盆花點綴畫樓東
豪飲當筵酒不空
長日故人雞黍約
可知投轄是家風

王意山孝廉

方照

京國翩翩賦壯遊
墜文軼事費搜求
酒酣聽汝瀾翻舌
當作三朝邸報投

李笙南提舉

維鏞

七十龍鍾尙請纓
販夫屠狗結平生
可憐思子登臺日

愁絕匡王六月征

長嗣勤甫孝廉
厚建勦匪陣亡

吳鐵君典簿

堯堯

半生不了數恩仇杯酒難澆磊塊愁試劍閣中頻試劍
月華如水浸簾鉤

陳詠橋明府

勸

粵海歸來兩袖風買山無力杖頭空郎君都解談文字
冷絕生涯筆墨中

萬迺鄰布衣

後丞

別具蕭閒出世姿襄陽圖畫孟陽詩夜涼秋簟渾如水
明月高樓寫竹枝

盧幼竹光祿

杰

棠花荆樹有清芬雙韭門牆世嫡尊一瓣南豐香不斷

好將書卷課兒孫

洪筱鄉孝廉

璇樞

河汾弟子盡名流
批點文章入選樓
和氣一團程伯子
春風座上不知秋

劉甦菴參軍

晉祥

兀坐蒲團靜似禪
焚香手校玉樞編
琴牀冷月淒蘭夢
誰識中郎第四絃

長女文卿爲余授詩弟子年十五以療疾亡

胡山甫明經

惟崇

小築名山斗室高
萬松當戶起秋濤
閒消歲月成孤隱
一局圍碁一斛醪

家樵孫比部

學履

征騎南來未解鞍
故鄉陰隔寄書難
朝衫典盡餘官債
冰暑秋曹徹骨寒

周艾軒理問

一英

近得周郎自懺書
空山木石耐幽居
黃金散盡知交冷
臨水柴門獨釣魚

凌韻士農部

行均

塵海茫茫日下昏
蒹鱸風味憶江村
扁舟一葉還家夢
暮雨寒潮送到門

劉藝蘭文學

鳳章

我愛劉郎最少年
珊珊丰骨地行仙
一生自具耽書癖
古本搜羅不計錢

張履齋上舍

篤慶

馬蹄荒草玉關秋
邊月寒生季子裘
我已曲終君不見
拚分殘夢到西州

時客涼州

月波寺

曉色起寒嵐
招客入幽勝
修竹環寺樓
雲深不知徑
天半忽聞聲
悠然度清磬

登寺樓望百步尖

兀然上高樓
湖光豁晴眺
空翠無定姿
翳林媚初曜
十

丈青芙蓉凌虛聳孤峭

松嶺

孤松挺歲寒西風與之角如有十萬軍乘虛戰危谷恐
驚山中人殘夢帶愁覺

觀音洞

盤盤鑿奇石剝落青苔衣洞口微雲生雨至不失時乃
知天地氣山澤呼吸之

大慈山史衛王墓

丞相墳前野草枯御題碑碣半模糊不知此地牛眠吉
勝似天童嶺上無

陶公山

陶公山下水深深苔覆漁磯樹覆岑絕代紅顏容一舸
起家赤手致千金秋風蔓草宮遊鹿寒月蘆花浪打禽
聞說煙波曾置館舊時臺榭費追尋

霞嶼

嵐氣浮曉煙中流蓄湖勢奉母遊補陀奇想闢天際鑿
石置洞天隱起佛光瑞四面開雲霞朝朝麗山寺笙歌
天外聲姬侍擁冠帔到今七百年臺宇盡荒廢古樹經
秋霜寒鴉向人墜我來憑弔時懷古發遐思昔聞鳳凰
山宮廟有圖記淮安飛渡江宸居作酒肆粵海厓山中

乘興曾野次慈元舊行殿轉眼水同逝興廢本無常憤
擊唾壺碎何況梵王宮秋巖賸空翠

湖上晚歸

絕壑探幽勝渾忘路幾灣亂峯秋樹碧危塔夕陽殷漁
唱前溪晚僧歸古寺閒片雲飛盡處獨鳥下松關

六一山房詩集卷四